

四庫全書

集部

欽定四庫全書

集部

文章辨體彙選卷二十一

詳校官中書臣金應琦

主事銜臣徐以坤覆勘

總校官檢討臣何思鈞

校對官編修臣勵守謙

謄錄監生臣于時和

欽定四庫全書

文章辨體彙選卷十七

明賀復徵編

制六

除呂公弼樞密使檢校太傅制

宋張方平

門下本朝之制地分二府之嚴執政之臣共幹庶邦之
重文武承式兵民是圖屬在賢明總司使職誕敷明制
敬告大庭具官呂公弼器縕純明機靈精邃瓌材任重

中廣廈之棟梁雅音自和合清廟之琴瑟登貳樞機之
密洽聞議慮之長屢陳憂國之言多發便時之策深明
王體有簡朕心宜陞帝傅之崇以正本兵之任爰田增
賦真食衍封名器益隆典章允穆於戲信而能用嘗思
明哲之難知無不為期盡臣鄰之益祇若休命以贊大
猷

祁國長公主進封衛國長公主制

司馬光

門下帝妹中行易象贊其元吉王姬下嫁召南美其肅

雍命服亞正后之尊主禮用上公之貴寵光之盛誰昔

釋訓誰昔昔也

而然矧同氣之至親推異數而何愛祁國長公

主席靈長之緒承濬哲之祥稟乾坤之粹和鍾日月之

明潤淵懿可度柔嘉有章志女功而忘勞承師教而不

倦今玉笄在首厭翟戒塗方結悅於皇家將執笄

音煩竹器

於士族宜疏沫土之邑俾適當富平之孫庸展茂恩誕孚

醲化於戲琴瑟靜好式昭和樂之音雷風順承是為常

久之道勿以夫家之平素有虧婦德之聽從祇服訓辭永

綏福履

皇第十女封慶壽公主制

歐陽修

門下詩紀王姬之盛車服之制甚嚴漢優帝女之儀湯
沐之封並列蓋敦國體匪曰親私維始被於寵章常推
擇於嘉號載稽成憲誕告外庭皇第十女寶婺分暉仙
源襲慶天姿異稟溫而有儀姆教不煩生而知善方居
妙歲蔚有令猷朕仰承燕翼之謀茲膺蕃衍之祉俾新
禮命式永褒榮於戲寵秩既崇在乎有德名稱甚美享

乃多休祗服茂恩勿忘明訓

除宋庠兵部尚書同中書門下平章事制

歐陽修

門下盡其制以饗親因而餒惠爵於朝而示衆所以褒
功考祭典而可稽著國章而有舊矧乃樞機之任維余
鼎鼎之臣飭事齋莊宣力左右方此慶行之始宜推寵
數之隆具官宋庠履行清純器識深茂夙有佳譽爵為
名臣文足以為國華學足以謀王體入則登於三事備
聲謨猷出則殿於大邦藹有風績自還機務頗歷歲時

秉一德以協恭出處不更其守展四體而盡瘁夙夜匪懈其勞屬盛禮之有成廣推恩而自近按夫輿地特啓於新封加以寵名蓋遵於故事維是便蕃之錫式仲春倚之懷於戲君子者邦之基大臣者民之表縉紳之望所屬老成德業之隆豈煩多訓服我休命往維欽哉

曾公亮加恩制

范鎮

門下朕觀前世之載考宗祀之文周漢舊章殘缺無次王鄭異說雜互莫同大抵奉親以嚴率民以孝交神明

於合莫厚風俗之本原具官曾公亮執禮蹈方刺經援古
變均大化固已治平制定多儀又皆節適四時之氣其
和見於豆籩九州之力其精在於玉帛使朕得昭升烈
考哀對上靈誠意所通顧饗如答惟時顯相宜有褒嘉
峻階品所以明等威崇衣號所以懋功賞陪敦多賦流
衍直封於戲大典越熙至恩胥暨惟裁成輔相以遂萬
物之宜惟同寅協恭以收庶工之效庸昭况施永乂基

圖

韓琦加恩制 王安石

門下朕祇率舊章肇稱吉禮對越天地具獲靈明之歆
相維公卿並膺休顯之賜其孚大號以寵元勳具官韓
琦躬受偉材出陪熙運保茲天子進無浮實之名正是
國人退有顧言之行間朝廷之兩社揉方域之萬邦辰
歆具臧器寶加重中辭機軸之要外即蕃屏之安衡統
紘絜備三公服飾之盛棗兜戟纛兼大將威儀之多序
績既崇修方彌謹協成宗祈之禮豫有顯功之勞肆衍

本封申加美稱於戲恩典徽數所以旌帝臣明德茂功
所以獎王室往惟勵翼服此褒嘉

賢妃苗氏進封德妃制

王珪

門下帝居六宮之制率輔於皇猷天極四星之華實裨
於壺事朕嗣膺邦統思穆人倫褒臨妃掖之英化始宸
闡之順命龜薦日班綉布朝賢妃苗氏性資惠明儀度
閒肅居恪箴圖之戒動循珩珮之和八月良家早被後
庭之選平陽別館爰開貴主之祥而能進遠驕華舉思

謙畏褕衣奉祀上以贊於后勤彤史流徽下以儀於嬪
則庸責德言之茂益隆位序之崇名以副勞議非能典
於戲坐而論婦之禮蓋視三公之尊內有進賢之心始
安君子之佐維正道然後式於外顧私謁不可躐於中
徃服訓辭永綏寵命

皇長女德寧公主進封徐國公主制

王珪

門下周美王姬之華下王后之一等漢推帝女之寵主
同姓之諸公故至愛形而九族歡內則正而四海順乃

睽公宮之懿適從世閥之速宜合丕彛用孚羣德皇長女
德寧公主仙支襲慶邦媛流徽鍾天性之深慈躬女圖
之茂矩幼而勤組紉之習亦既飾婦事之修長則有室
家之歸將以經人倫之始維衿鞶之有命維車馬之有
行卜仲冬之嘉辰祉大易之元吉瓊華在著已戒齊風
之醕粉水疏園莫如徐國之樂侈燕謀於皇裔克美化
於民間顯錫徽章大旌柔度於戲前攬唐家之制盥饋
不可以闕供近稽仁廟之撫冠服仍從於少損蓋肅雍

者賢之檢儉約者古之師其體至懷自膺長譽

除郝質殿前都指揮使安武軍節度使加勲食邑

實封制

王珪

門下國家統御之勢大維持之業隆外倚四巖藩翰之
臣中謀萬夫貔虎之帥故奉委裘而羣情固聞受瑁而
三靈趨肇臨發政之辰首下放朝之命具位郝質性資
莊厚氣畧沈雄通玉帳之善經體金行之正氣自昔先
帝知為勁臣因其勤舊之名立在親信之地會綴衣之

陳牖提衛甲之環宮曾無夜螿之譁自得剛牙之重紹
帝符於景祚渙邦號於前彛視秩冠於文昌徙節臨乎
安武加以總正使範敦封并旌嚴陞之勞以表師干之
寵於戲天之壁壘象在羽林王之爪牙職於圻父蓋地
嚴則必資拱扈之力師衆則猶賴訓齊之方往堅壯圖
思答殊遇

除李璋殿前副都指揮使武康軍節度使制

王珪

門下羽林神兵北環天衛之象黃帝李法中嚴邦律之

師國家鬯武節於四遐提禁屯於干列進總凝嚴之護
歷圖勁傑之資稽衆得人告廷孚命具官李璋氣沈而
果事性裕而知方厲許國之單忠達治兵之善志緒服
高華之望名推親信之良朕念長樂之慈愴不及養顧
渭陽之族聞蓋多賢自擢領於戎昭已積遷於留寄屬
巖除之缺帥宜齋鉞之命才六蠢啓途旣襲重侯之貴
萬兵留帳方資緩帶之安雖其素勞不曰異寵於戲執
干戈則有社稷之衛常慎於假人聽鼓鼙則有將帥之

思實深於注意維蹈忠義者急於報主蓋喜功名者要
之逢時勉規壯圖尚率明訓

除呂公著守司空同平章軍國事制

蘇軾

門下仁莫大於求舊智莫良於用衆既得天下之大老
彼將安歸以至國人皆曰賢夫然後用今朕一舉仁智
在焉宜告在朝以孚大號具官呂公著許謨經遠精識
造微非堯舜不談昔聞天語以社稷為悅今見其心三
年有成百揆時敘維乃烈考相於昭陵蓋清淨以寧民

亦勞謙而得士凡我儀刑之老多其賓客之餘在武丁
時雖莫追於前列作召公考固無易於象賢而乃屢貢
封章力求退避朕重失此三益之友而閔勞以萬幾之
煩是用遷平土之司釋文昌之任毋廢議論時遊廟堂
於戲大事雖咨於房喬非如悔莫能果斷重德無逾於
郭令而裴度亦寄安危罔俾斯人專美唐世

除范純仁大中大夫守尚書右僕射兼中書侍郎

制
蘇軾

門下朕惟朝廷之盛衰常以輔相為輕重若根本強固精神折衝故為呂臣奉已而不在民則晉文無復憂色汲長孺直諫而守死節則淮南為之寢謀朕思得其人付之以政使天下聞風而心服則人主無為而日尊咨爾在廷咸聽朕命具官范純仁器遠任重才周識明進如孟子之敬王退若蕭生之憂國朕覽觀仁祖之遺迹永懷慶厯之元臣強諫不忘喜臧孫之有後戎公是似命召虎以來宣雖兵政之與聞疑遠猷之未究坐論西

省進貳文昌增秩益封兼隆異數於戲時難得而易失
民難安而易危予欲守在四夷以汝為偃兵之姚宋予
欲藏於百姓以汝為息民之蕭曹勉思古人以稱朕意
可授尚書右僕射兼貳中書之職

王安石贈太傅制

蘇軾

勅朕式觀古初灼見天意將有非常之大事必生希世
之異人使其名高一時學貫千載智足以達其道辯足
以行其言瑰瑋之文足以藻飾萬物卓絕之行足以風

動四方用能於期歲之間靡然變天下之俗具官王安
石少學孔孟晚師瞿聃網羅六藝之遺文斷以己意據
糝百家之陳迹作新斯人屬熙寧之有為冠羣賢而首
用信任之篤古今所無方需功業之成遽起山林之興
浮雲何有脫屣如遺屢爭席於漁樵不亂羣於麋鹿進
退之美雍容可觀朕方臨御之初哀疚固極乃眷三朝
之老邈在大江之南究觀規模想見風采豈謂告終之
問在予諒闇之中胡不百年為之一涕於戲死生用舍

之際孰能違天贈賻哀榮之文豈不在我寵以師臣之位爵為儒者之光庶幾有知服我休命

西蕃邈川首領阿里庫加食邑制

蘇頌

祭有十倫之義施爵賞以為先福者百順之名本忠孝之自出朕祇祓陽館崇嚴禰宮配神穹昊之尊流澤幅員之廣嘉與卿士同茲慶休便蕃優渥之恩固無內外之異告於朝案布乃言綸具官阿里庫生有軼材少負偉畧稟天地之義氣得秦豳之遺風奠塞外之封疆繼

承列土擁河西之旄鉞坐護諸羌長雄一方作我西屏
屬九筵之講禮盛四海之駿奔來獻其琛寶相予祀是
用加命王公之數視秩帝傳之崇增井賦於爰田廣國
租於真食於戲爾有時享歲貢之恪史不絕書我有駿
神觀政之方惠必及下既均承於純嘏宜益厲於忠規
往服訓言克享天祿

除皇弟顧保信保靜軍節度使進封嘉王制

元絳

門下史謂建大宗之封如安磐石之固詩美得同氣之

助若敷崇棣之華朕紹五聖之休昭九族之序固已倚
天屬於本根之重措公姓於翰翰之強况於至親宜有
顯冊播告羣位厥維大公具官顯燕翼發祥溫恭迪詰
英姿茂而玉裕盛氣粹而揚休講執服儒多推道術之
對好禮樂善雅有智思之文鄉稽立愛之經屢衍建侯
之寵有華上公之袞有倣元戎之旂賢儀寔明師論參
穆是用端筴以審繇按圖而定名表為真王奄受樂國
畫岷峨之埜陪以妥田易肥渙之麾加之兩組循典常

而出閤謹著定以奉朝列第環宮彌聳開元之觀側門
通禁永承長樂之顏備飭愛懷布章慶譽於戲展親以
誠信我則友於天倫秉德以輔陪爾則蕃於王室思長
富貴之守懋底忠孝之成往其欽哉以對猷訓

除韓琦京兆尹再任判大名府制

元絳

門下分陝稱伯召南當公職之尊啓魏就封畢萬得國
名之大况吾元老為世宗臣久倚師垣之嚴宜遷尹節
之寵飭宣典策敷告縉紳具官韓琦道醇而深器遠而

博渾渾忠孝之業憲憲文武之姿感通仁廟亮衆采於
台極翼戴英考捧大明於天衢肆朕纘圖厥初謀落變
諧四氣之序熙輯百官之成登昭公槐奄蒞國社鎮定
大事妥如九鼎之安承寧諸侯端若元龜之信歲勤再
閱師律既和重念郊圻之雄旁據河山之險徒得君重
以宣王靈就更西雍之旄留主北門之鑰載敦爰賦并
實榦封於戲漢谷陳平安危注於上意唐用裴度輕重
繫乎厥身維乃純誠無愧前烈懋服休命往其欽哉

封荆王顧太傅武寧鎮海節度使制 鄧潤甫

門下朕惟國大憂紹天明命黃陵玉座永懷復土之深
清廟朱紘序陟寧神之禮哀恫罔極感慕從中念宗藩
尊屬之賢有文考同生之愛圖功甚茂送達良勤敷告
大廷肆放贊冊具官顧身端而行治識遠而量夷地則
茂親時惟明德翼戴王室雅有二南之風表儀宗支獨
包兩獻之學協策廟祉乃心朝廷昨朕承祧疇勞錫命
屬緝裕陵之禮遠獲靈駕之行事有感懷義當褒異是

用進以官班之等寵之帝傳之崇出節徐郊建麾青社
以應采菽來朝之賜以慰棠棣孔懷之情於戲詩美大
宗是為四國之翰禮尊叔父固曰一人之嘉往服寵光
益膺福祉

除皇弟德武成軍節度使祁國公制

鄧潤甫

門下朕奉承燕謀獲紹大統永懷先烈曷勝哀疚之情
眷顧同生宜厚褒封之典予我明命揚於治廷皇弟德
岐嶷得於自然溫文見於異稟挾天材之美質應帝武

之嘉祥未臨射矢之辰遽起號弓之慕踰年於此錫壤
惟時矧周人尚親尤重本支之務漢廷左戚亦隆襁褓
之封規裁半楚之疆載徹濱河之域苴茅制社授鉞殿
邦用建上公尹茲北國策勲加等衍邑實租於戲西望
裕陵敢忘幼子之愛東朝長信進預諸孫之游徃服恩
輝益延壽祉

除呂公著右僕射制

鄧潤甫

門下國莫難於置相君莫重於知人堯舜之隆益以疇

浴而熙載商周之盛至於夢卜而求賢天降割於我家
予未堪於多難思用者德交秉政鈞其數寵章以詔羣
辟具官呂公著行應儀表學通本原忠義得於天資功
名自其世美被遇先帝嘗入贊於樞庭暨予冲人遂同
寅於政路傳經意以謀國體推上澤以紓民心叙收雋
賢補苴法度方重不倚雅有大臣之風調娛適中遂通
當時之務是用陞之右揆委以繁機申衍爰田陪敦真
賦爾則代天而理物子則羞考以惟君於戲丞相之位

未嘗無其人儒者之效久不白於世孟軻言無有者數百
歲揚雄稱自得者二三臣蓋迪遠業者其功難循近迹
者其力易勉行所學以底丕平

邢氏進號賢妃制

孫洙

門下王宮六寢崇建婦官天極四星垂著妃象所以協
宣陰教助穆宸闈矧視秩於上公暨敷求於淑哲朕厲
精於治選納尤希嬪嬙靡充位號多闕茲延登於邦媛
用布告於路朝婉儀邢氏德稱後庭體合法相居念保

阿之訓動循環珮之音授弓矢於禡祠占熊羆於吉夢
是宜詳案舊典并備列妃進參禴狄之華益昭彤管之
煒坐論婦禮正始國風品冠六儀名超九御於戲周南
之咏卷耳無險詖私謁之心齊詩之美鷄鳴有警戒相
成之道寵靈烜赫禮秩優隆匪時婉孌之良疇若褒嘉
之命佐后內治爾尚勉哉

復元祐皇后孟氏制

蔡京

朕紹休列聖承訓東朝施惠行仁既誕孚於有衆念今

追往用敦叙於邦家廢后孟氏頃自動門嬪於王室得罪先帝退處道宮逮茲累年克庸祇德皇太后念仙遊之浸邈撫前事以興悲惻然深矜示不終廢申崇位叙還復宮庭乃詔輔臣具依審議雖元符建號已位於中宮而永泰上賓無嫌於並后於戲原情起義蓋示親親之恩克已慎身宜成婦婦之道其率循於懿範以上答於深仁往服茂恩永膺多福

蔡京降太子少保致仕制

張閣

政事所寄尤嚴誤國之誅人臣之姦莫重欺君之罪我有常憲揚於大廷太師致仕楚國公蔡京頃以時才久膺柄任兩冠台衡之峻三登公衮之崇庶圖爾庸以弼予治而總秉機務出入八年事寢紊於將來謀悉達於初議擅作威福妄興事功輕爵祿以示私恩濫錫予以蠹邦用借助姻婭密布要途聚引兇邪合成死黨以至假利民而決興化之水託祝聖以飾臨平之山豈曰懷忠殆將徼福屢有告陳之迹每連狂悖之嫌雖僅上於

印章猶久留於里第偃蹇弗避傲睨罔悛致帝意之未孚
昭星文而申譴言章繼上公議靡容固欲用恩難以屈
法宜褫師臣之秩俾參宮保之官聊慰羣情尚為寬典
於戲天事尚象明罰所以引災人道惡盈省躬所以引
咎往欽善貸無重後愆

以王倫為通問使制

張闡

朕惟疆事未寧親庭在遠夙宵軫念庶孝悌通於神明
物色求人儻忠信行於蠻貊眷茲久矣今乃得之以爾

胄出公侯資兼勇智言念主憂而臣辱何有於生如皆
已佚而人勞孰當其責雖淹回之未試獨慷慨以請行
宜升郎秩之榮仍委使華之重朕既俯同晉國用魏絳
以和戎爾其遠慕侯生御太公而歸漢勿憚徂征之遠
佇期歸報之休

皇子除檢校少保節度使郡王制

李綱

朝廷尊爵式昭貴貴之儀父子主恩必厚親親之典眷
時賢嗣夙挺天材其疏茅土之封以篤邦家之慶飭宣

典冊敷告縉紘皇子具官某雅量淵澄英資玉粹鍾五行之秀氣備四序之純和聰知夙成溫文自得曩稽立愛之義茂舉建侯之章擁元戎之節旌備上公之袞烏尊德樂道克循就傳之規立禮興詩日懋通經之訓載遵彝制宜有褒崇是用按圖以定名拂龜而協吉奄授樂國易鎮雄藩言觀其旂錫中軍之徒御大啓爾宇胙南土之山川越陪邑戶之多兼畀國租之實併彰異數式慰茲懷於戲保祐自天并貺本支之茂封建厥福聿

崇廟社之休維忠孝可以報君親之恩維恭儉可以長
富貴之守徃服朕命益介壽康

文章辨體彙選卷十七

欽定四庫全書

文章辨體彙選卷十八

明 賀復徵 編

制七

元帥烏葉爾封謚制

元姚燧

惟太祖之基命龍遂乘雲有良臣以樹勳魚猶得水展
我同姓豈伊異人具官烏葉爾氣鍾光嶽之純全誠貫
金石之堅確智足謀國勇則冠軍佐天運之維新憤人

心之未定既降復叛必煩以行故自北而徂南首遼尾
魏亦攘左而塞右膺齊背秦語其跋履於四方數豈戎
衣之百襲為庸已懋其報宜豐可當非劉氏之不王姑
啓若魯侯之大宇併中褒典少慰英靈噫佳城之鬱年
三千名固已昭乎白日分國於肇州十二澤期不斬於
黃河可贈某官追封營國公諡忠勇

許衡為懷孟教官制

楊果

咨爾許衡天資雅厚經學精專大凡講論之間深得聖

賢之與受罰者恐陳君所短為盜者畏王烈之知所在
向風真堪正俗可令於懷孟等處選棟子弟俊秀者舉
歸教育取作範模再令董子帷前有傳授之弟子重使
王通門下皆經濟之名臣毋喪斯文以弼予治

趙與芮降封平原郡公制

王構

我國家法天立統稽古象賢武定方維暨聲猷之益廣
恩加降附宜寵數之兼隆迺矚者英共敷制冊趙與芮
身端而行治識遠而量夷曩在南邦屬為近戚儼若典

刑之舊歸然位望之尊阻隣好以弗修知天心之厭楚
棄官榮而高蹈偉王子之去殷幾年退處於鄉閭庶事
靡聞於朝著執吾信使惟彼權姦爰興問罪之師用慰
後蘇之望江左之連城不守始奉表以請降浙東之遺
老雖存亦挈族而來覲然制有上下等威之別而情無
親疎遠近之殊分土惟三爵已崇於而主降級以兩名
未正於爾躬是用晉以文階賁之華綬天秩亞上公之
貴月卿躋太府之班於戲辨宗伯之九儀王者所以示

綏懷之禮兼洪範之五福人臣所以全安養之榮茂對寵
光往堅素履可授金紫光祿大夫檢校大司農平原郡
公

平章李庭贈諡制

張士觀

混一之期有開於真主恢攘之寄允賴於忠臣其器博
則用迺周其才全則效斯著顧奏捷獨多於羣帥而酬
庸豈限於彛章故榮祿大夫平章政事議樞密院事提
調諸衛屯田事兼後衛親軍都指揮使李庭宣力襄樊

振威嶺海甫師干之歷試俄斧鉞之升崇劔敵萬人縱
橫制變衝當一面出入如神納之牛腹而獲生載賈登
陴之勇蔽以馬韉而捷驚疇爭執訊之能其韜鈴動合
於昔賢故聲烈特聞於今日至於扈聖祖東降僭孽所
向無前翼先朝西奠遐陬其猶克壯決策於未然而策
無遺者審幾之先見而幾則灼然緬懷熊豹之姿忍聽
鼓鞞之奏生也加封之弗逮名焉節惠以為宜於戲黼
冕桓圭昭其文昭其度玉符麟節傳之子傳之孫精爽

如存寵光無數可特贈推忠翊衛功臣儀同三司太保
上柱國追封益國公諡武毅

梅思禮授大都府副使制

明蘇伯衡

建庶官以臨萬國任莫重於本兵掌邦政而統六師選
必先於碩輔具官梅思禮材資驍勇器量雄深胸襟韜
畧之奇被服詩書之雅早登華貴作鎮藩翰保境安民
待四方之底定提疆籍戶爰一旦而來歸明炳幾先忠
於內附蓋去留灼知乎天命肆危疑克斷以人謀辭項

從劉知同曲逆舍囂去述識擬伏波凡我師徒束兵而
下淮甸暨其士女安堵有如泰山靜言思之厥功懋矣
是用擢居宥密俾贊樞機匪彰效順之勤式示輸誠之
勸於戲立非常之功則有非常之賞既肇錫以殊恩奮
國士之報以酬國士之知益圖臻於顯效可授大都府
副使

常遇春追封開平王制

蘇伯衡

天開鴻業篤生英傑之臣星隕將營載舉哀榮之典肆

大勲之垂集俄上將之云亡庸錫褒封誕頒渙號具官
常某英敏而沈毅嚴肅而恢弘自初建於義旗即來歸
於戎旆首從淮右揚采石之鋒旋定江東振丹陽之捷
拓邊疆於全楚殲強敵於三吳掃河洛而奠中原指幽
燕而平朔土功成百戰允為一世之豪氣蓋三軍豈特
萬人之勇近報灤陽之凱益窮漠北之追攬哀訃之遽
來知力疾而猶戰眷言忠蓋深用痛傷海宇一家既已
成於大統君臣同體期共享於太平事乃若斯情何能

已秩庸陞於次相爵兼錫於真王雖禮數之有加於予
心其猶歉於戲金書鐵券曷忘佐運之功袞衣繡裳尚
服飾終之命寵靈弗替祚胤彌昌

少傅吏部尚書文淵閣大學士許讚制

高拱

鼎台重任寅亮攸資殿閣親臣平章是託乃攝儲輔再
領銓衡眷遇之隆於斯為至匪繇英傑曷稱簡求具官
某閎才邃學蔚為時宗亮德淵聞直追往哲蚤以儒科
之彥佐政名邦爰晉中臺再遷史局令猷既茂勁節尤

堅觸忤權璫遂遭擯抑及罪人之既得屬正士之獲伸乃
歷藩臬則威信交孚乃晉卿聯則廉勤特著掌邦禁而
時無冤獄掌邦賦而蓄有羨財朕乃簡置天曹俾長百
辟儉回為之黜伏賢雋賴以登庸歷歲滋多碩膚荐積
朕益加悅特進揆司爾乃啓心陳帷幄之謀正色決樞
機之務丞弼不遑於旦夕憂勤罔間於初終誠可為良
佐也已頃建闕宮之禮實藉鈞衡之容既有以交於神
明宜與之共其福祿茲授爾階光祿大夫勲柱國錫之

誥命於戲予欲典刑有位爾惟老成予欲保乂有邦爾
惟平格其尚益輸忱悃殫竭訐謨茂宗夾輔之勲丕副
仰成之願欽哉

文章辨體彙選卷十八

欽定四庫全書

文章辨體彙選卷十九

明 賀復徵 編

誥一

徐師曾曰按字書云誥者告也告上曰告發下曰誥古者上下有誥故下以誥上仲虺之誥是也上以誥下大誥洛誥之類是也周禮士師以五戒先後刑罰其二曰誥用之於會同以諭衆也秦廢古法止稱制

誥漢武帝元狩六年始復作之然亦不以命官唐世
王言亦不稱誥至宋始以命庶官而追贈大臣貶責
有罪贈封其祖父妻室凡不宣於廷者皆用之故所
作尤多然考歐蘇曾王諸集通謂之制是制之一名
統諸詔命七者而言若細分之則制與誥亦自有別
故文鑑分類甚明不相混雜足以辯二體之異矣其
辭有散文有四六今制命官不用制誥至三載考績
則用誥以褒美五品以上官而贈封其親及賜大臣

勳階贈諡皆用之六品以下則用勅命其詞皆兼二體亦兼前代而損益之也 復徵曰考文苑英華亦有中書制誥翰林制詔之別疑出中書者為誥出翰林者為制蓋誥止施於庶官而大臣諸王則稱制書也後人一以為制云又曰按宋亦有內制外制之別文鑑內制曰制多除授大臣文用四六外制曰誥則俱屬庶司常用散文間亦有四六者我明大夫曰誥命郎官曰勅命則是唐宋制重而誥輕明則勅輕而誥

重合而觀之可以知唐宋明三代之損益矣

東巡誥 漢張衡

惟二月初吉帝將狩於岱嶽展義省方觀民設教丙寅
朏率羣賓備法駕以祖於東門屆於靈宮是日也有鳳
雙集於臺壬辰祀上帝於明堂帝曰咨予不材為天地
主慄慄翹翹百僚萬幾心之謂矣孰朕之勞上帝有靈
不替朕命誕敢不祗承凡庶與祭於壇墀之位者曰懷
爾邦君實願先帝載厥大宗以左右朕躬羣臣曰帝道

橫被旁行海表一人有韙萬民賴之從巡助祭者茲惟
嘉瑞乃歌曰皇皇者鳳通玄知時萃於山趾與帝邀期
吉事有祥惟漢之祺帝曰朕不敢當亦不敢故天之吉
命

昆弟誥 晉夏侯湛

惟正月哉生魄湛若曰咨爾昆弟淳琬瑁謨總瞻古人
有言孝乎惟孝友于兄弟死喪之戚兄弟孔懷又曰周
之有至德也莫如兄弟於戲古之載於訓籍傳於詩書

者厥乃不思不可不行爾其專乃心一乃聽砥礪乃性
以聽我之格言淳等拜手稽首湛若曰嗚呼惟我皇乃
祖滕公肇釐厥德厥功以左右漢祖弘濟於嗣君用垂
祚於後世世增敷前軌濟其好行美德明允相繼冠冕
胥及以逮於皇曾祖愍侯寅亮魏祖用康又厥世遂啓
土宇以大綜厥勲於家我皇祖穆侯崇厥基以允釐顯
志用恢闡我令業維我后府君侯祗服哲命欽明文思
以熙柔我家道丕隆我先緒欽若稽古訓用敷訓典籍

乃綜其微言嗚呼自三墳五典八索九丘圖緯六藝及
百家衆流罔不探蹟索隱鉤深致遠洪範九疇契倫攸
敘乃命世立言越用繼尼父之大業斯文在茲且九齡
而我王母薛妃登遐我后孝思罔極惟以奉於穆侯之
繼室蔡姬以致其子道蔡姬登遐隘於穆侯之命厥禮
乃不得成用不祔於祖始惟乃用騁其永慕厥乃以疾
辭位用遜於厥家布衣席橐以終於三載厥乃古訓無
文我后丕孝其心用假於厥制以穆於世父使君侯惟

伯后聰明睿智弈世載德用慈友於我后我惟烝烝是
虔罔不克承厥誨用增茂我敦篤以播休美於一世厥
乃可不遵惟我用夙夜匪懈日鑽其道而仰之彌高鑽
之彌堅我用欲罷不敢豈唯予躬是懼寔令跡是奉厥
乃晝分而食夜分而寢豈唯令跡是畏寔爾猶是儀嗚
呼予其敬哉俞予聞之周之有至德有婦人焉我母氏
羊姬宣慈愷悌明粹篤誠以撫訓羣子厥乃我齟齬則
受厥教於書學未遑惟寧敦詩書禮樂孳孳弗倦我有

識惟與汝服厥誨惟仁義惟孝友是尚憂深思遠祇以
防於微翳義形於色厚愛平恕以濟其寬裕用緝和我
七子訓迪我五妹惟我兄弟姊妹束修慎行用不辱於
冠帶實母氏是憑子其為政最爾惟母氏仁之不行是
感子其望色思寬獄之不情教之不泰是訓子其納戒
思詳嗚呼惟母氏信著於不言行感於神明若夫恭事
於蔡姬敦穆於九族乃高於古之人古之人厥乃千里
承師矧我惟父惟母世德之餘烈服膺之弗可及景仰

之弗可階汝其念哉俾羣弟天祚於我家俾爾咸休明
是履淳英哉文明柔順琬乃沈毅篤固惟瑫厥清粹平
理謨茂哉雋哲宙亮總其弘肅簡雅瞻乃純鑠惠和惟
我蒙蔽極否於義訓嗟爾六弟汝其滋義洗心以補予
之尤予乃亦不敢忘汝之闕嗚呼小子瞻汝其見予之
長於仁未見予之長於義也瞻曰俞以如何湛若曰我
之肇於總角以逮於弱冠暨於今之二毛愛學於先載
約誨於嚴父慈母予其敬忌於厥身而匡予之纖介翼

予之小疵使予有過未曾不知予知之過改惟冲子是
賴予親於心愛於衆敬於貌厥乃口無擇言柔惠且直
廉而不劇肅而不厲厥其成予哉用集我父母之訓庶
明厲翼邇可遠在茲瞻拜手稽首曰俞湛曰都在修身
在愛人瞻曰吁惟聖其難之湛曰都厥不行惟難厥行
惟易淳曰俞明而昧崇而卑冲而恒顯而賢同而疑厲
而柔和而矜湛曰俞乃言厥有道淳曰俞祇服訓湛曰
來琬汝亦昌言琬曰俞身不及於人不敢墮於勤厥故

惟新湛曰俞瑫亦昌言瑫曰俞滋敬於己不滋敬於己
惟敬乃恃無忘有恥湛曰俞謨亦昌言謨曰俞無忘於
不可不虞形貌以心訪心於虞湛曰俞總亦昌言總曰
俞若憂厥憂以休湛曰俞瞻亦昌言瞻曰俞復外惟內
取諸內不忘諸外湛曰俞休哉淳等拜手稽首湛亦拜
手稽首乃歌曰明德復哉家道休哉世祚悠哉百祿周
哉又作歌曰訊德恭哉訓翼從哉內外康哉皆拜曰欽

哉

復徵曰錄東巡昆弟二誥為一卷以志三代之遺唐宋而後純以命官無復古制矣

文章辨體彙選卷十九

欽定四庫全書

文章辨體彙選卷二十

明 賀復徵 編

誥二

登州黃縣尉東方辛可密州司士參軍誥

宋歐陽

修

勅朕以信示天下而以祿報有功今爾辛緣死事而命於官然按察者糾失職而來有請按察吾所詔也不從則

不自信念功吾所急也不報則無所勸焉是用易爾散秩優爾俸祿免爾吏責俾爾自安庶幾使吾信賞並行而不失

太子中允通判秦州馮誥可太常丞誥

歐陽修

勅具官馮誥西鄙用師久矣而未見成功然凡從事於兵間者微勞小善未嘗不錄而稍為久次已曰滯材夫材者必能集吾事賞者所以圖厥功吾無愛焉以觀汝效

前杭州司理參軍范袞可衛尉寺丞誥

歐陽修

勅朕觀兩漢名臣多或出於丞史小吏非夫丞史之能
出名臣也乃知古雖吏屬亦必選用賢材焉今中書丞
相之職比古公府曹掾之制吏員已為簡闕欲任其事
豈不擇人故詔銓衡俾其慎選具官范袞有司來上以
爾為材進爾諸丞往率乃職古人可慕毋自怠焉

虞部員外郎李備太子中舍侯克明大理寺丞曹

瑛等磨勘改官誥

歐陽修

勅具官李備等國家外建庶位以官羣士而賞罰進退之法掌於有司者所以待中材之無過者爾高能異效吾有不次之用焉爾等咸服於官久勤歲月以勞敘進雖曰寵榮勉爾所為以期懋賞

龍衛指揮使开贊拱聖指揮使胡元並可內殿承

制誥 歐陽修

勅具官开贊等朕之勁兵銳將戍於邊者不可勝數惟爾能以武勇出乎其間方吾思得猛士之時吾之大臣

以爾來上高爵厚祿為爾等而設也往其勉矣吾將觀
汝之能

內殿崇班李允恭可內殿承制誥

歐陽修

勅具官李允恭朕惠州縣之吏不職者不能禦姦禁暴

而憫吾民罹於賊盜

一作盜賊

故於捕盜之吏推賞尤厚非

以為私蓋有為也今爾之請

一作課

自陳其勞方吾以賞

行勸之時惟恐不及故加爾寵非徇爾私夫古者讓功

不言之賢惟爾宜慕

奏舉人杭州觀察推官呂邁可大理寺丞誥

歐陽

修

勅具官某夫士之處世如錐在囊中其鋒立見爾以選
吏為藩府賓佐凡薦爾材者自戩等十有二人是必脫
穎而出其輩者矣不然何言者之多也擢爾卿屬試爾
治民無謂寵利之可圖因違道以干譽其思行義以自
立務求已而為人服此訓辭則無疵吝

太常少卿張鑄可光祿卿致仕誥

劉敞

勅古者有司年至則致仕所以恭讓而不盡其力也具官
張鑄履尚夷粹足以檢俗精力強敏足以濟物而能顧
禮畏義用上印鞅朕閔勞以官職之煩今聽其請夫佚
老之士雖不輸力於朝其矯風節不亦過絕保祿持寵
不知止者乎俾列九卿以榮其歸祇若休命思底終譽
可授光祿卿終身

定武軍節度使推官衛觀可大理丞常州團練推

官阮披可衛尉寺丞誥

劉敬

勅衛觀等昔唐有天下諸侯自辟幕府之士維其才能
不問所從來而朝廷常收其俊偉以補王官之缺是以
號稱得人今州郡從事皆吏部旨授然其試之臨政而
不苟察其行已而有立亦皆一時之選已故吾亦且命
以九卿之屬使漸而升於朝觀與拔也既歷試於外又
亟稱於知己得人之聲庶必能勉

無為軍錄事參軍馬易簡可太子中舍致仕誥

劉敞

勅具官馬易簡控搏祿利者至於遷籍損年飾貌匿衰

以緩退休之期爾齒未耄仕無缺行能決於去庸非廉乎自下郡掾升東宮屬歸安鄉閭足為榮觀矣

宰相富弼奏試國子四門助教王淵宰相韓琦奏

鄉貢進士李常並可試將作監主簿誥

劉敞

勅曩者朕觀祀清廟推恩延賞而大臣得薦其門下之士置之仕籍今丞相以常等聞夫與我陶冶萬物長育人材者非丞相歟何惜一命以慰士大夫之望其春所履毋辱已知

起居舍人直祕閣同修起居注司馬光知制誥誥王

安石

勅先王誥命之文何其雅馴而與美雖出命非有司之事而討論潤色蓋有助焉以爾具官某操行修潔博知經術庶乎能以所學施於訓辭俾掌贊教往諧朕志

左司諫王陶可皇子伴讀誥

王安石

自天子至於士未有不待學而成者今朕欲進諸子於學求可與居者而大臣以爾為言爾久在諫垣有聞於

世茲惟慎選可不勉哉

高旦著作佐郎誥

王安石

勅某唐虞以三考黜陟幽明而其所命或終身於一職然則其所謂陟者蓋爵服之加而已今之增位猶古之加爵服也以爾久於職事而功用應於有司之法故使增位以報焉雖考績之歲月與黜陟之方古今不同而吾所以褒勵庶工非與唐虞異意爾其毋怠思稱厥官可

李端卿等舊官服闋誥

王安石

勅其孝子之悲哀思慕其親豈有窮哉然喪以三年而止者聖人之政也爾以喪致事日月既除其就故官以聽新命夫人之行莫大於孝而孝亦在乎事君能致其身而不愆於義以辱其名然後可以為孝子此宜爾之所知也其勉矣哉

前著作佐郎周濤太常太祝梁構光祿寺丞致仕

誥

王安石

勅某爾嘗辭祿而在位以爾為材宜諸京官使長一邑
果能有績以見推稱將酬爾勞遽以疾告夫學士大夫
之去位豈苟自佚而無為古之仕焉而已者爾蓋聞其
風矣丞於卿位維是懋哉

故贈司空兼侍中龐籍遺表第五女大理評事趙

彥若妻德安縣君誥

王安石

勅龐氏爾考常輔佐先帝而有勞於國今其不幸為爾
請封夫以女子受爵於朝而不繫其夫其亦榮矣往惟

順淑以服寵榮

文章辨體彙選卷二十

欽定四庫全書

文章辨體彙選卷二十一

明 賀復徵 編

誥三

給事中兼侍講傅堯俞可吏部侍郎誥

宋蘇軾

勅士以德望進則風俗厚而朝廷尊以經術用則議論正而名器重此君子所以難合而朕亦難其人焉具官傅堯俞篤學博行久聞於世歷事四世挺然一節懷道

不試十年於茲朕欲聞仁人之言置之講席非堯舜之道蓋未嘗言給事黃門未究其用往貳太宰益修厥官董正治典以稱先帝復古之意

太常少卿趙瞻可戶部侍郎誥

蘇軾

勅理財正辭禁民為非曰義先王之論理財也必繼之以正辭名正而言順則財可得而理民可得而正自頃功利之臣言政而不及化言利而不及義中外紛然朕蓋厭之具官趙瞻明於吏事輔以儒術忠義之節白首

不衰爰自秩宗擢貳邦計將使四方之人知予以耆老
舊德居此官者蓋有盡徹之意焉

王誨知河中府誥

蘇軾

勅具官王誨汝以名臣子老於治郡所至安靜吏民宜
之河東吾股肱郡方唐之盛世有賢守風流未遠圖像
具存勉思古人以紹前列

邵剛通判泗州誥

蘇軾

勅具官邵剛詩云淑問如皋陶在泮獻囚獄訟之事固

儒者之所學也汝官於上庠既習其說矣其往試之

李承之知青州誥

蘇軾

勅朕東望齊魯之國河岱之間沃野千里生齒億萬商
農阜通儒俠雜居可以大度長者服難以細謹法吏治
也具官李承之生於甲族世為名臣屢試有勞所見者
大肆予命汝尹茲東土昔曹參為齊問治於其師蓋公
蓋公曰治道貴清靜而民自定汝師其言則予汝嘉

張汝賢可直龍圖閣發運副使誥

蘇軾

勅具官張汝賢朝廷於南方復置都漕者所以均節諸路之有無使歲課時入而已非以求贏也至俗吏為之則多收羨財以幸恩寵而民受其病以爾昔為御史號稱敢言奉使江表罪人斯得庶幾知義利之分者是以命爾寵之新職往惟欽哉

范子淵知峽州誥

蘇軾

勅具官范子淵汝以有限之財興必不可成之役驅無辜之民置之必死之地橫費之財猶可以力補而既死

之民不可以復生此議者所以不汝置而朕亦不得以赦原也夷陵雖小尚有民社朕有愧於民而於汝則厚矣

范純禮可吏部侍郎誥

蘇軾

勅具官范純禮嗚呼維乃顯考克明德秉哲以左右我仁宗俾配德於堯舜天亦維相之使世有人以任我樞機將帥之事今汝獨在外計朕惟瑚璉不可以褻用驥馭不可以小試命以天官之屬其少進之益觀其能往

欽哉

黎珣知南雄州誥

蘇軾

勅黎珣嶺海之遠吏輕為姦非良守令民無所赴告往
祇厥官如在近甸則予汝嘉

呂由庚太常寺太祝誥

蘇軾

勅具官呂由庚先皇帝有賢執法朕不及思也思其人
行其言用其平生所予者猶以為未足也而錄其子鳴
呼亦可以識朕意也夫詩云惟其有之是以似之汝勉

之哉朕不汝忘

呂大臨太學博士誥

蘇軾

大學禮義之所從出也不擇人以為法而恃法以為治可乎漢之郭泰符融唐之陽城韓愈士皆靡然化之其賢於法遠矣朕方召有司疏理學政而近侍之臣言汝可用必能於法禁之外使士有所愧而不為乃稱朕意

韓維故妻蘇氏永嘉郡夫人誥

蘇軾撰

勅婦人有德行才智之能而不得施於事有言語文章

之美而不得聞於人而况仁而不壽賢而不祿者乎此
詩人所以賦彤管而史氏所以傳列女也具官某故妻
蘇氏少以女士秀於閨門來嬪德人動以禮法而不得
與君子偕老翟芾以朝哀哉若人命之不淑其改賜湯
沐寵以訓詞庶幾采蘋之遺芳不與宿草而共盡

呂公著妻魯氏贈國夫人誥

蘇軾

勅婦人之德如玉在淵雖不可見必形諸外視其夫有
羔羊之直相其子有麟趾之仁則內德之茂可從知矣

具官呂公著故妻魯氏名臣之子元老之婦所資者深
故志存乎仁所見者大故動協於禮環珮穆然閨門化
之而降年不永祿不配德其改封大國正位小君庶幾
為女史之光非獨慰其夫子而已

宣德郎劉錫永父元年一百四歲可承事郎誥

蘇軾

勅劉元年尚齒教民三代之義咨爾百年之故老乃吾
六世之遺民自非吉人莫享上壽張蒼事秦柱下而至
漢孝景思邈生隋開皇而及唐永淳古有其人乃今親

見何愛一命慰其子孫

童珪父參年一百二歲可承務郎致仕誥

蘇軾

勅童珪父參古者天子巡守方岳之下問百年者就見之而絳縣役者趙武謫其輿尉今汝黃髮鮐背以上壽聞其可使與編戶齒乎往以忠孝教而子孫

西京左藏庫副使楊文廣可供備庫使誥

沈文

通

勅具官楊文廣前日南夷負恩為亂以覆壞我郡邑至

於用師而後定雖朕不德不能懷服外方而亦將吏不
戒不習之罪也故深察徃失而推擇所遣益不敢輕惟
爾文廣材武忠勇更事有勞故令以爾總一道之兵戍
於邕管又陞爾於諸使之正以重其行爾其祇聽朕命
戒疆事習軍計使南徼無警而朕為知人則時乃之功
矣其徃欽哉

西京左藏庫副使高允元可文思副使誥

沈文通

勅武吏以材勇進以功力賞古之制也方天下無事兵

革不試則汝武吏安得自効以取賞哉然內外之職歲月之勞亦不可遺也今允元最狀既應陟法其增秩一等以明勸郡吏

皇姪右千牛衛將軍士儵皇弟右千牛衛將軍叔

媽可並右監門衛大將軍誥

王震

勅宗子無職事之勞而有考績之法者親親之恩欲有加而無已也然非迪教飾身則弗應有司之格衛府之師浸富貴矣往其祇哉

朝奉郎蘇軾可守禮部郎中誥 王震

勅具官蘇軾爾議論文章卓然名世而失職浸久所學未伸今茲命爾為郎以待不次之選孔子曰如或知爾則何以哉維爾之才不患無位

朝奉大夫少府少監呂希績可權發遣潁州誥 王

震

勅具官呂希績今之郡守乃唐刺史郎官出入之資也爾以選擇入省故出得善州夫愷悌之政非文深吏所

能成也唯爾懋哉務稱吾意

陝西運副呂大忠知陝府誥

曾肇


勅具官呂大忠朕於用人不盡其力不奪其志均其勞
佚欲臣下悅而知勸也爾以材諳久勤於外自陝以西
兵食所賴而屢以疾告自請方州甘棠之郊姑遂爾欲
坐嘯卧治安其土風庶幾少休毋忘忠報

除徐鐸張崇翟思太學博士誥

曾肇

博士列於成均以講教為任爾以經明選用往服厥官

蓋尊其所聞以誘率學者汝之守也其尚欽哉



文章辨體彙選卷二十一

欽定四庫全書

集部

文章辨體彙選卷二十六

詳校官中書臣金應珩

主事銜臣徐以坤覆勘

總校官檢討臣何思鈞

校對官編修臣勵守謙

謄錄監生臣于時和

欽定四庫全書

文章辨體彙選卷二十二

明 賀復徵 編

誥四

皇外考妣追封誥

明王禕

朕惟歷代君天下者推恩必及於后族親親之道也皇
后馬氏勤勞內助化家為國非其親之積德何以致此
稽於典禮是用追封皇外考馬某為徐王皇外妣為

徐夫人仍立廟以奉祀事於戲親之至則思遠報之至則禮崇尚惟幽靈歆茲卹典

趙德勝贈江西平章政事追封梁國公誥命

王禕

開國之初朕賴爪牙之士執干戈以拓疆土其有捐軀徇國而沒於王事烏得不深念之哉其官趙德勝剛果有識勇毅絕倫始自滁和奮迹行伍乃從渡江拔采石取姑孰遂定建業克丹陽破毘陵皆預有功乃陞帥職從大將下宣城江陰攻吳興錢塘收青陽石碛龍襄宜興

高郵而安慶九江鄂堵南昌之役其功益著及守南昌
平山寇靖屬邑朕甚嘉之爰膺僉樞之命夫何敵兵
侵城竭力備禦誤中矢鏑竟隕其身於戲有功而不及
親受其報朕之念爾何能忘之是用陟以崇階列職台
輔仍封大國建於上公以示飾終之儀以昭勸忠之道
英靈如在尚克歆承

杭琪除戶部尚書誥命

王禕

國家以戶口土田之事徭役職貢之方與夫會計倉廩

府庫經費周給之數一歸之於戶部古之制也必才周而識精者始稱茲選具官杭琪處事詳練敷歷為久皆能展其所長爰佐太農遂貳戶曹涖事唯謹勞績優著朕甚嘉之是用俾爾陞任地官之長尚其明生財之道務培邦本使食貨充而國用足以稱朕節用愛人之意

高安除給事中誥命

王禕

有事殿內之臣其職為親且近是以漢有夕拜之事唐

有塗歸之儀朕稽古建官仍置厥職雖封駁之制不沿於昔而論思獻納之助蓋有望焉以爾英敏之資闡偉之器自乃祖父奮起西土世濟其美為時名臣爾生於名門蚤踐華要以閥閱之子弟習臺閣之威儀朕甄錄遺才無間疎戚酌於衆論俾列邇聯顧方樂受盡言務勤庶政凡有關於公議其毋憚於敷陳益懋嘉猷圖稱予望

太史令劉基誥命

朱升

帝王膺歷數於天順時命以頒政教建官擇人宜莫先焉
昔在唐帝乃命羲和三代太史之職察天文紀時政占
候紀載同出一官推天合人古之道也當斯之任者實
在通儒劉基學貫天人資兼文武少壯之年策名科甲
擾攘之際控馭一方逮從朕遊首陳遠畧為邦之本末
用武之後先爾能言之朕能審而用之式克至於今日
諸所建明一存成效太史之事蓋所優為是用因其舊
官錫以新命爾其用協五紀允釐百工勗耆德納嘉猷

以副欽天圖治之心則予以懌

伏羌伯毛銳加封太子太保誥命

王鏊

朕惟自昔人臣能為國家宣力於內外者必有殊恩異數以示報禮之隆昭等威之重伏羌伯毛銳乃考忠事我憲廟分鎮西陲將師固原捐軀徇國爰受伯爵以貽後昆爾銳早閑韜畧綽有父風朕用授之齊斧徃甸南服蠡茲蠻夷寇攘草竊爾乃身先士卒抵觸瘴霧深入炎荒多所斬獲盪定逋寇朕嘉乃功是用進爾為太子

太保爾尚一乃心靖乃守紹乃先烈俾嶺海之間遠近
久安乃至林蠻洞蜒罔不率服朕永無南顧之慮時乃
之休

定國公徐文壁誥命

馮琦

制曰國家褒答元勳爰及苗裔載在盟府與國無極其
恩數羣臣莫敢望焉蓋其先有非常之功非常者非常
格所能擬也爾具官某紹休前緒綰綬戎樞當天下無
事韜鈴無所用惟是斤斤遵禮度奉朝請以端恪謙退

自持劔珮成行惟汝首列瑋璧在設惟汝肅將念爾為
勲臣首事朕久長特賜爾命不著為令甲於戲惟爾祖
有大勲勞於國家當其時櫛沐風雨踐涉險阻為子孫
開業其勤至矣爾是以及此夫惟念爾祖修厥德然後
可對揚天子之丕顯休命爾其敬哉

刑部左侍郎何源誥命

馮琦

制曰朝廷所操以治天下惟三尺法耳朕痛小民無知
而懼於文網故數詔緩天下大辟惟司寇少司寇守文

釋滯是攝是贊以制百姓於刑之中諭朕志焉爾具官
清謹端亮恬於聲利自邑牧更諸曹郎為天官之屬廷
中皆稱其公平擢拜奉常拂衣高謝頃采廷論起爾田
間踐歷卿寺以佐太宰於留都及召貳司寇而爾亦清
白奉職察麗求中庶獄亡寃五刑惟允庶幾所稱淑問
者焉所司計爾歲績來奏是用授爾階通議大夫錫之
誥命於戲爾祖喬新以大司寇表著於先朝爾紹厥家
聲典茲邦禁惟子孫必復其始尚克時忱乃亦有終欽

哉欽哉惟刑之恤

河南開封府知府王見賓誥命

馮琦

制曰開封一大都會也風俗雜而市獄繁非夫酌寬猛
權緩急者弗任也爾河南開封府知府王見賓性行高
雅明習政事出為理官入為比部中外皆稱其廉平擢
守大邦剗理繁劇歲數不登以政為歲有擊強之明無
烹鮮之擾朕甚嘉焉是用授爾階中憲大夫錫之誥命
夫大梁當天下中四方所視效吾所以褒勞爾意不獨

為開封也益弘爾猷比於潁川渤海風示百城垂則羣
吏則予女嘉欽哉

廣西梧州府鬱林州知州江龍誥命

馮琦

制曰吾甚重考課而念遠方之吏非有勞無過及有任
舉者不得考而遠方使者不時至其程功見效被璽書
者十不得一焉爾廣西梧州府鬱林州知州江龍以鄉
薦入官越在荒服倅我晉興守我左陽比於今三仕不
易地十年不易節朕甚嘉之茲授爾階奉直大夫錫之

誥命嗚呼吾何爾逝之有綜名實累功效以登進羣吏
即萬里外不難見也爾無毀成朕不忘遠欽哉

文章辨體彙選卷二十二

欽定四庫全書

文章辨體彙選卷二十三

明 賀復徵 編

誥五

悉利族軍主嗟移可都軍主誥

宋歐陽修

勅嗟移夫賊壘未平王師在野當吾聞鼓鞶思將帥之際是汝立功名取富貴之時而能率其部人力捍狂寇材武忠勇是皆可嘉爵秩階勲茲以為寵猶有異賞爾

其圖之

備供庫副使郭承緒可西京左藏庫副使誥

歐陽

修

勅具官郭承緒夫善訓卒者少而愈精善用兵者寡可擊衆一障之守苟得其人推恩信以悅士心明教習以修武備捍城禦寇其任豈輕顧爾宣勞頗勤歲月今茲考績宜有一作寵章爾其勉哉思奮厥效

呂惠卿責授建寧軍節度副使本州安置不得簽

書公事誥

蕪軼

凶人在位民不奠居司寇失刑士有異論稍正滔天之
罪永為垂世之規具官呂惠卿以斗筭之才挾穿窬之
智諂事宰輔同升廟堂樂禍而貪功好兵而喜殺以聚
斂為仁義以法律為詩書首建青苗次行助役均輸之
政自同商賈手實之禍下及鷄豚苟可蠹國以害民率
皆攘臂而稱首先皇帝求賢若不及從善如轉圜始以
帝堯之心姑試伯鯨終然孔子之聖不信宰予發其宿

姦諂之輔郡尚疑改過稍畀重權復陳罔上之言繼有
礪山之貶反覆教戒惡心不悛躁輕矯誣德音猶在始
與知己共為欺君喜則摩足以相歡怒則反目以相噬
連起大獄發其私書黨與交攻幾半天下姦賊狼籍橫
被江東至其復用之年始倡西戎之隙妄出新意變亂
舊章力引狂生之謀馴致永樂之禍興言及此流涕何
追迨予踐祚之初首發安邊之詔假我號令成汝詐謀
不圖渙汗之文止為款賊之具迷國不道從古罕聞尚

寬兩觀之誅薄示三危之竄國有常典朕不敢私

林希中書舍人誥

蘇軾

勅文章之變與時盛衰譬如八音可以觀政而况誥命
之出學者所師號令以之重輕風俗因而厚薄本朝革
五代積衰之氣繼兩漢爾雅之文而大道中微異端所
汨欲復祖宗之舊必以訓詞為先故難其人不以輕授
具官林希博聞強識篤學力行綽有建安之風流逮聞
正始之議論往踐外制為朝廷常潤色其精微期配昔

人使天下識典刑之髣髴務究所學朕將觀焉

贈韓維曾祖處均燕國公誥

蘇軾

勅漢諸袁之父子四世繼出五公唐諸溫之兄弟同時
並列三省載在國史古無擬倫眷予世臣有若韓氏億
事仁祖始參大政篤生三子咸秉國成豈惟嗣世之賢
實賴積善之報具官某曾祖某潛德不耀久而自彰天
祚厥家世濟其美盛矣曾孫之貴爵為三壽之朋逮予
纘嗣之初繼受艱難之託允文而靖既直且溫旋觀純

德之全尚識遺風之自是用因上公之舊秩開北國之
新封仰以增廟室之光華俯以慰丞嘗之怵惕

高密郡王宗晟建安郡王宗綽所生母孫氏封國

太夫人誥

蘇軾

勅母以子貴春秋之義也朕方因親以教愛廣愛以及
民封節婦之間以勸能賢賜高年之爵以助養老而况
屬籍至近賢王篤生欲大慰於慈心宜特推於異數孫
氏四德純備五福荐臻豈惟擢秀於閨門固已流芳於

宮闈舉觴坐上有伯仁仲智之賢持節洛濱皆汝南琅
邪之貴爰改封於樂土俾正位於小君服我休恩介爾
眉壽

蘇軾孫從事郎符改宣教郎誥

汪藻

論世者豈惟喬木懷人者猶及甘棠偉哉千載之英繫
吾五朝之望朕不及見有孫而才宜加政秩之榮用示
好賢之意昔賈生明王道漢錄賈嘉之能魏公進忠規
唐表魏暮之烈人門兼用古今所同其振爾之家聲以

待予之器使

文章辨體彙選卷二十三

欽定四庫全書

文章辨體彙選卷二十四

明 賀復徵 編

誥六

中書右丞相徐達兼太子少傅封信國公誥命

明

朱升

命將出師立興王之大業建邦啓土資佐運之功臣仗
斧鉞而成顯功秉鈞衡而宅揆右才為異等賞亦非常

乎告朝廷誕宣綸綍中書左丞相徐達剛資英傑達量
深雄巖巖山嶽之崇矯矯虎貔之猛從予起兵於濠上
先存捧日之心逮茲定鼎於江南遂作擎天之柱氣冠
萬人而無敵拔幟摧城威行四境以推恩撫民安堵牙
旗指顧淮海風清雷鼓鏗鉤湖湘率服西連巴蜀東際
溟洋有征則總水陸之軍戎所向則收郡邑之圖籍削
平二強國古之名將何以加辛勤十餘年吾之封疆繇
此定奏蘇湖之捷俘臣主而歸允謂元勳宜膺上爵尊

榮相府仍加開國之褒輔導儲宮尤重兼官之選於戲
太公韜畧當強一統之規鄧禹功名特列諸侯之表用
頒寵數尚克欽承

朱升除翰林侍講學士誥命

陶安

朕聞洙泗集羣聖之大成新安為文公之闕里先後相
望斯文盛昌况新安之有人與前賢而同氏允為博古
通今之士者年碩望之英是宜備顧問於內庭參密命
於翰苑惟茲華要用寵師儒朱升趨蹌禮法之場超卓

傳註之表羣經獨得其趣諸子莫遁其情網羅百家馳騁千古自其潛心積累至於皓首蒼顏用功勤矣朕開基以來歲每徵聘彋彋束帛為矜式於國中青青子衿來英才於館下議禮作樂郊廟所資修己及人國家所尚擢登王署侍講彤闈鳳池兼掌於絲綸麟史仍參於筆削天地交泰有資贊翊之功雲漢昭回共致文明之

治

潘興祖授飛熊衛指揮使誥命

蘇伯衡

環衛之司實居左右勳舊是任用表勤勞具官某直而
能容剛而不撓方渡江之伊始即杖策而來歸奮前驅
而擢彼南征列中堅而保茲東土奔走禦侮蓋無戰而
不從艱難備嘗斯有功而必錄戎旃再典獎命荐膺綽
有休聲既克副於望實誕加峻秩庶足展其威名督騎
士總材官任良重矣訓武經申兵法爾其勉之

王弼授驍騎衛同知指揮誥命

蘇伯衡

社稷之守必在於爪牙拱扈之臣視之猶心膂克膺茲

選實難其人具官王弼沉靜可嘉果敢無敵始列右廣
繼長千夫屬橐鞬而率先戎行時將十載聞鼓鼙而克
勤乃事勇冠一軍儋爵之恩愈隆汗馬之勞益著迨茲
升擢彌切倚毗帶礪山河朕不遺於故舊功銘竹帛爾
式克於欽承

都察院左都御史史琳誥命

王鏊

制曰生而効職固臣子之當為歿有加封乃朝廷之異
數爰敦終始用勵賢能故具官某擢自甲科翔於諫苑

累更任使多著勤勞况博識乎古今仍兼資乎韜畧比
更新化圖任老成惠文彈治乎臺端爾猷具在齊斧寄
分於閫外我武惟揚顧不戰以屈人兵乃無妄而求物
議方資夾輔遽爾淪亡贈典已行朕懷未慊茲復贈爾
太子太保於戲賞以功酬未盡生前之報秩由恩進益
增歿後之光

臨淮侯李言恭誥命

馮琦

制曰戎政大臣總率南北羽林材官蹶張所以厲武節

折奸萌強根本示天下重也非勲勞不二心之臣無任
焉爾具官某才兼文武世篤忠貞壯猷奮於請纓逸思
徵於橫槊副司留都之鑰晉登大將之壇卒乘盡屬橐
鞬耳目在於旗鼓遠恢上畧獨制中權遂使輦轂之間
隱有干城之壯宜頒異數以祚殊勲是用加爾太子太
保錫之誥命昔李光弼為太師一出號令氣色精明光
弼之封亦臨淮也爾為世臣膺此重任遠師武穆之紀
律近法韓國之忠勤尚克時忱無替朕命欽哉

禮部尚書兼翰林院學士朱賡誥命

馮琦

制曰典朕三禮無如伯夷之清教子一經是成甘盤之
學庸霈露蕭之澤以紓風木之悲爾原任直隸揚州府
泰州知州累贈通議大夫太子賓客吏部左侍郎兼翰
林院侍讀學士朱公節乃其官某之父本以宿儒蔚為
循吏筮仕壯縣繼典方州明允懸三尺之平操持稟四
知之畏惟爾崇德象賢之嗣為予責難陳善之臣眷乃
啓沃之勞疏茲寅清之秩念十年帷幄暫遠闕庭溯一

德淵源推恩禰廟茲特贈爾如子官於戲資事父之敬
以致之於君久矢忠悃因如母之愛以施及於父式慰
孝思歆服龍章增華馬鬣

王世貞父右都御史贈兵部尚書王忬誥命

馮琦

制曰蓋臣徇國之忠蒙九死而靡悔善人積德之報歷
再世以彌昌士論久而後明天道定而始勝雖沒不朽
惟國有章爾原任都察院右都御史贈兵部尚書王忬
乃南京兵部右侍郎世貞之父天與孤忠人推亮節爰

從臺憲即荷春知感島夷於江南摧兵氛於薊北轅門
禦侮詎忘疆場之勞請室蒙辜原非朝廷之意庸採輿
論追晉崇階餘慶所鍾啓爾象賢之子遺忠未泯作予
華國之臣瞻念義方宜申寵命是用加贈爾資政大夫
於戲六月清霜雪沈寃於既往九原白日照幽魄以如
存歆服廷綸永光廟祐

禮部尚書兼翰林院學士李騰芳繼妻陳氏贈夫

人誥命 繆昌期

制曰朕聞正始以代有終安家以寧天下然偕老之義或難得於無成而代終之宜多觀祥於長發故有嗣徽以禪往者有遺慶以畀來人得地之道成家之禎具官某繼妻累贈淑人陳氏桂質自芬珉心更素夢紉蘭而託體承諼草以開顏鳩居鵲之成巢遂成肯構琴依瑟而合調誰悟更絃使我出居之臣不愁無室含飴之老載及抱孫人雖云邈德何能忘茲特加贈爾為夫人媿美大家之風沒而不朽正名小君之禮死其有知

吏部文選司員外郎周順昌妻誥命

繆昌期

制曰史稱鄧攸為吏部妻息皆素食而山濤之妻時以
倫鑒聞一以操一以識也朕有清郎其閨門之助不可
無褒爾吏部文選清吏司員外郎周順昌妻累封安人
吳氏夙嫻內儀休有華問機杼相讀既黽勉以御窮基
縞從官猶相忘於屏貴及里門之居守乃管鑰之惟嚴
肅括家人內言無出訓勅爾子外交無入則爾夫之塞
竇於竿牘而盛飾於簋盥也爾不亦有助乎是用加封

爾為宜人凡朕之所以褒爾以其有素食之風也爾夫多稽阮之游爾能鑒識朕終以山公之業望爾夫矣

贈太常寺卿原任吏科都給事中魏大中誥命

倪

元璐

制曰夫光岳凝翕是生忠義之臣天地晦蒙彌表艱貞之節故劉陶殞貞北寺楊震殉烈西亭並以禍極一時聲流千載爾具管其生有自視死如歸原其至清絕塵太剛制物可以貪繩蟬蚓肉視虎狼故累百知一鴉

之可尊嫉邪如神羊之必觸爰自輶軒之使陟於瑣闥
之班洵歷清垣旋臻天掖銳心平治極論興衰節足相
宣夔睢坐別時謂司隸陽球之既陟此輩安容假使銅
鞮伯華而無死天下其定而會以相分公媪當祭京童
貫之時士元君宗開竇武陳蕃之禍惟爾壇帷逾峻尤
為繒繳所先貝錦一成雉羅遂及詔求鉤黨獄署同文
膺滂碎首於黃門喬固暴尸於城北三光黯沒海水羣
飛當此之時亦云極矣今者世灰大滌天宇重晶朕是

用章闡幽忠崇敷顯秩震雷一夕已踣元祐之碑解澤
重泉大表比干之墓特追贈爾為某官錫之誥命以爾
臣忠章為子孝伊濂之義生死同揆彌奇卞壺佇章鮑
昱嗚呼位於箕尾識歸天傳說之星炳彼丹青寶入地
萇弘之血

贈太常寺卿原任吏部文選司員外郎周順昌誥

命 倪元璐

制曰夫孤情之所獨抗得死而成正氣之所不徂造生

彌永所以屈平嫉俗轉快志於懷沙長弘殞身遂飛華
於化碧資其扶世寵以教忠爾具官某希聖得清擇節
取苦伍羞絳灌哭是賈生之才兒命融修罵亦禰衡之
氣當其出為從事入典銓衡並以晶心章其茂節會當
龍亢馴致蟲拚時則指鹿之惡浮於望夷出鼠之威極
於北寺來周羅吉箝網四張喬固膺滂梏欽相結焚原
盪岳不可邇親固有懼禍之夫閉門而拒岑睭知幾之
士築室以擬袁閔而爾獨持虎執獲泳湯席鑊班荆悲

咽尊酒豪攄俠抗左儒義依鄒浩忍捐愛息以徇累拏
本有荆軻湛族之心不止邱成分宅之德于是飛章告
密檻車下徵而衆乃成城吳幾為沼至於焚香進食以
禮御囚飛臂投竿而殺詔使魚驚獸亂釜沸波翻詎止
廣漢被收吏民守闕鮑宣下獄生徒聚幡而已哉然而
磯激難平虎騎不下卒不得脫以罹於凶而爾對簿不
屈絕命彌雄雖復漢尉銜鬚唐臣嚼齒未有並其慷慨
儼此從容者矣今捩軸既旋袞鉞並設碑踣元祐大升

公正之羣墓顯湯陰恍見孤忠之氣用特贈爾為某官
錫之誥命國家謹嚴近寺培養人才而在旁之奸烈於
二正歲寒之節見彼前賢要以道極一時義激天下明
興以來一人而已嗚呼學聖人之中寧存狂狷睹忠臣
之報彌愧奸回

太常寺少卿沈維炳誥命

倪元璐

制曰夫為治不本禮樂猶燭明不以火也今天下大發
其朝氣功利富強茁然而欲見王霸道雜與治日遠朕

誠欲建中和之極使夫幽明洞疏神人之和若傳烽可
召則至治已有能為朕夷夔者乎爾具官某昔以健令
擻壯梧垣蹇諤能言僵直自遂而釁生於破柱禍極於
沈河猿亡致延弓矢忌得意存覆楚勢欲乾池矧爾亢
貴君宗示難鵠的繒繳之及固其宜矣今者覓陸既決
碩果僅存召首諸垣俾弊羣吏而爾法辦筌施道劑硝
乳用使繁妖之氣化為明霞玄黃之心消於砥矢朕嘉
乃績擢貳容臺昔堯顯寅清漢遴忠孝若其以爾精義

出為駿奔達裡享之心和民神之意原本道德旁邕文章將九叙坐訶三靈自順禮樂興舉詎須百年乎會逢覃叙授爾某階錫之誥命嗚呼朕即左操天道右挈祖功四召鬼神之情伐鼓而號於有位不如使子奉璋而求之也俎豆之事勿曰嘗聞往而學焉苟通其故大治日出雖至於馘虜俘夷朕能知所繇來必舉而功子已

文章辨體彙選卷二十四